



Polelo ea Komisi e Ikemetseng ea Likhetho Lesotho (IEC) malebana le

Likhetho tsa Naha ka la 3 Phuptjane 2017

ka

Justice Mahapela Lehohla(OMMOM)

Molula-Setulo oa Komisi

Maseru, 03 Motšeanong 2017.

1. Kea le lumelisa Basotho ba heso hohle moo le leng hona teng; Lesotho, Africa Boroa le mose ho maoatle lebitsong la Komisi e Ikemetseng ea Likhetho (IEC) Lesotho.
2. Joalo ka ha le tseba Basotho ba heso; Motlotlehi Letsie la Boraro o laetse hore Likhetho tse akaretsang tsa naha li tle li tšoaroe ka la 03 Phuptjane 2017.
3. Likhetho tsena ke tse sa tloaelehang hobane ka mor'a likhetho tsa 2015, tse latelang tseo li ne li lokela ho tšoaroa ka 2020. Empa ha ho ea ba joalo, ke ka hoo re reng likhetho tsena tsa la 3 Phuptjane 2017 ke tsa tsome (snap elections).
4. Ho latela lenane la tšebetso (Elections Timetable) nako ea boitokisetso ba likhetho e qalile ka la 13 'Mesa 2017 'me e tla fela ka la 10 Phuptjane 2017.
5. Matla a Komisi e Ikemetseng ea Likhetho a kolla ho:
 - (i) Molao oa Motheo oa Lesotho, (Constitution)
 - (ii) Molao oa Naha oa Likhetho (National Assembly Electoral Act 2011).
6. Ha e le mona hee Basotho ba heso re ea Likhethong tse akaretsang tsa naha; Komisi e Ikemetseng ea Likhetho e le kopa ka hlomphe le boikokobetso hore bohle-bohle ba amehang, (*mekha le Makhotla a Lipolotiki, baphatlalatsi ba litaba, balateli ba mekha ea lipolotiki, mekhatlo ea Sechaba le lona Sechaba ka kakaretso*); re eeng likhethong tsena ka khotso, re bolokile seriti sa rona sa botho, sa Basotho re bolokile molao (Law & Order) nakong ena ea boiketo ba Likhetho, nakong ea Likhetho le kamorao ho tsona.
7. Ka la 18 'Mesa, Baetapele ba Makhotla le Mekha ea lipolotiki Lesotho, ba ile ba tekana Tokomane eo ba itlamang le ho ikamahanya le molao oa boits'oaro nakong ea likhetho (Code of Conduct). Re ipiletsa ke hona hore bohle ba amehang ba boloke boitlamo boo ba bona.
 - Sechaba sa heso, liqholotso tsohle tseo naha ena ea rona, eo re e ratang haholo, e tobaneng le tsona, li tlama e mong le e mong oa rona ho ithukhubetsa ka sekahla ho li fenyha.
 - Ha re leboheng mahlohonolo ao re le Basotho, esale re apesoa ka ona.

- Ha re kopaneng bohle ho tataisetsa mafapha ohle a sechaba sa rona ho hahamalla ho fihla khotsong, bonngoeng le leratong; tseo baholo-holo ba rona ba re sietseng tsona.
- Boitlhompho, boikokobetso le boikitlaetso li ke li ipabile lipuong le liketsong tsa rona.
- Ha e le rona ba Komisi e Ikemetseng ea Likhetho, re tiisa le ho itlamba hore ho latela Molao oa Motheo oa Naha le oa Naha oa Likhetho, re tla etsa mosebetsi oa rona – kante ho litšekamelong tsa letho (le ha e kaba tsa mofuta ofe kapa ofe), re bolokile boikemelo ba rona; ka tšepo e tihileng, 'me kante ho tsabo le khethollo. Re tla phetha ts'ebetso ea likhetho ka tsela e amohelehang ho bohle, 'me e bonaletsang; e le hore re tle re be le likhetho tse lokolohileng, le hona tsa khotso, bolokolohi le khutso.

8. Sechaba sa heso kea leboha!

Molimo o boloke Lesotho

Molimo o boloke Basotho

Khotso!!!